

摘藻堂四庫全書薈要

史部

欽定四庫全書薈要

史部

唐書卷二百二十一上



欽定四庫全書薈要卷五千三百六十四

史部

唐書卷二百二十一上

宋端明殿學士宋祁撰

傳第一百四十六上

西域

泥婆羅直吐蕃之西樂陵川土多赤銅犂牛俗翦髮逮
眉穿耳植以簫若角緩至肩者為姣好無七筋攬而食
其器皆用銅其居版屋畫壁俗不知牛耕故少田作習

商賈一幅布蔽身日數盥浴重博戲通推步厯術祀天神鐫石為象日浴之烹羊以祭鑄銅為錢面文人形背牛馬形其君服珠頗黎車渠珊瑚虎魄垂纓耳金鈎玉璫佩寶伏突御師子大牀燎香布花於堂而大臣坐地不藉左右持兵數百列侍宮中有七重樓覆銅瓦楹檻皆大珎雜寶四隅置銅槽下有金龍口激水仰注槽中初王那陵提婆之父為其叔所殺提婆出奔吐蕃納之遂臣吐蕃貞觀中遣使者李義表到天竺道其國提婆

大喜延使者同觀阿耆婆汧池池廣數十丈水常湔沸
共傳旱潦未始耗溢或抵以物則生煙釜其上少選可
熟二十一年遣使入獻波稜酢菜渾提蔥永徽時其王
尸利那連陀羅又遣使入貢

党項漢西羌別種魏晉後微甚周滅宕昌鄧至而党項
始彊其地古析支也東距松州西葉護南春桑迷桑等
羌北吐谷渾處山谷崎嶇大抵三千里以姓別為部一
姓又分為小部落大者萬騎小數千不能相統故有細

封氏費聽氏往利氏頗超氏野辭氏房當氏米禽氏拓
拔氏而拓拔最彊土著有棟宇織犂尾羊毛覆屋歲一
易俗尚武無法令賦役人壽多過百歲然好為盜更相
剽殺尤重複讎未得所欲者蓬首垢顏跣足草食殺已
乃復男女衣裘褐被羶畜犂牛馬驢羊以食不耕稼地
寒五月草生八月霜降無文字候草木記歲三年一相
聚殺牛羊祭天取麥他國以釀酒妻其庶母伯叔母兄
嫂子弟婦惟不娶同姓老而死子孫不哭少死則曰天

枉乃悲貞觀三年南會州都督鄭元璫鑄諭其酋細封
步賴舉部降太宗璽詔慰撫步賴因入朝宴錫特異以
其地為軌州即授刺史步賴請率兵討吐谷渾其後諸
酋長悉內屬以其地為岨奉嚴遠四州即首領拜刺史
有拓拔赤辭者初臣吐谷渾慕容伏允待之厚與結婚
諸羌已歸獨不至李靖擊吐谷渾赤辭屯狼道峽抗王
師鄜州刺史久且洛生欲諭降之辭曰渾主以腹心待
我不知其他若速去且汙吾刀洛生怒引輕騎破之肅

遠山斬首數百級虜雜畜六十帝因其勝又令約降赤
辭從子思頭潛納款其下拓拔細豆亦降赤辭知宗族
攜沮稍欲自歸岷州都督劉師立復誘之即與思頭俱
內屬以其地為懿嵯麟可三十二州以松州為都督府
擢赤辭西戎州都督賜氏李貢職遂不絕於是自河首
積石山而東皆為中國地後吐蕃寢盛拓拔畏偏請內
徙始詔慶州置靜邊等州處之地乃入吐蕃其處者皆
為吐蕃役屬更號弭藥又有黑党項者居赤水西其長

號敦善王慕容伏允之走也依之及吐谷渾款附敦善
王亦納貢居雪山者曰破丑氏又有白蘭羌吐蕃謂之
丁零左屬党項右與多彌接勝兵萬人勇戰鬪善作兵
俗與党項同武德六年使者入朝明年以其地為維恭
二州貞觀六年與契苾數十萬內屬永徽時特浪生羌
卜樓大首領凍就率衆來屬以其地為劍州龍朔後白
蘭春桑及白狗羌為吐蕃所臣藉其兵為前驅白狗與
東會州接勝兵纔千人在西北者天授中內附戶凡二

十萬以其地為朝吳浮歸十州散居靈夏間至德末為吐蕃所誘使為鄉導鈔邊俄悔悟更來朝願助靈州饒輓乾元間中國數亂因寇邠寧二州肅宗詔郭子儀都統朔方邠寧鄜坊節度事以鄜州刺史杜冕邠州刺史桑如珪分二隊出討子儀至党項潰去上元元年在涇隴部落十萬衆詣鳳翔節度使崔光遠降二年與渾奴刺連和寇寶鷄殺吏民掠財珍焚大散關入鳳州殺刺史蕭悅節度使李鼎追擊走之明年又攻梁州刺史李

勉走進寇奉天大掠華原同官去詔臧希讓代勉為刺史於是歸順乾封歸義順化和寧和義保善寧定羅雲朝鳳凡十州部落詣希讓獻欵弓節印詔可僕固懷恩之叛誘党項渾奴刺入寇衆數萬掠鳳翔盤屋大酋鄭廷郝德入同州刺史韋勝走節度使周智光破之澄城閱月又入同州焚官私室廬壁馬蘭山郭子儀遣兵襲之退保三堡子儀遣慕容休明諭降廷德子儀以党項吐谷渾部落散處鹽慶等州其地與吐蕃濱近易相脅

即表徙靜邊州都督夏州樂容等六府党項于銀州之
北夏州之東寧朔州吐谷渾住夏西以離沮之召靜邊
州大首領左羽林大將軍拓拔朝光等五刺史入朝厚
賜賚使還綏其部先是慶州有破丑氏族三野利氏族
五把利氏族一與吐蕃姻援贊普悉王之因是擾邊凡
十年子儀表工部尚書路嗣恭為朔方留後將作少監
梁進用為押党項部落使置行慶州且言党項陰結吐
蕃為變可遣使者招慰芟其反謀因令進用為慶州刺

史嚴邏以絕吐蕃往來道代宗然之又表置靜邊芳池
相興五州都督長史永平旭定清寧寧保忠順靜塞萬
吉等七州都督府於是破丑野利把利三部及思樂州
刺史拓拔乞梅等皆入朝宜定州刺史折磨布落芳池
州野利部竝徙綏延州大厯末野利禿羅都與吐蕃叛
招餘族不應子儀擊之斬禿羅都而野利景庭野利剛
以其部數千人入附雞子川六州部落曰野利越詩野
利龍兒野利厥律兒黃野海野宰等居慶州者號東山

部夏州者號平夏部永泰後稍徙石州後為永安將阿
史那思陳賦索無極遂亡走河西元和時復置宥州護
党項至大和中寢彊數寇掠然器械鈍苦畏唐兵精則
以善馬購鎧善羊貿弓矢廊坊道軍糧使李石表禁商
人不得以旗幟甲冑五兵入部落告者舉罪人財畀之
至開成末種落愈繁富賈人齎繒寶鬻羊馬藩鎮乘其
利彊市之或不得直部人怨相率為亂至靈鹽道不通
武宗以侍御史為使招定分三印以邠寧延屬崔彥曾

鹽夏長澤屬李鄠靈武麟勝屬鄭賀皆緋衣銀魚而功
不克宣宗大中四年內掠邠寧詔鳳翔李業河東李拭
合節度兵討之宰相白敏中為都統帝出近苑或以竹
一箇植舍外見纔尺許遠且百步帝屬二矢曰党羌窮
寇仍歲暴吾鄙今我約射竹中則彼當自亡不中我且
索天下兵翦之終不以此賊遺子孫左右注目帝一發
竹分矢徹諸外左右呼萬歲不閱月羌果破殄餘種竄
南山始天寶末平夏部有戰功擢容州刺史天柱軍使

其裔孫拓拔思恭咸通末竊據宥州稱刺史黃巢入長
安與鄜州李孝昌壇而坎牲誓討賊僖宗賢之以為左
武衛將軍權知夏綏銀節度事次王橋為巢所敗更與
鄭畋四節度盟屯渭橋中和二年詔為京城西面都統
檢校司空同中書門下平章事俄進四面都統權知京
兆尹賊平兼太子太傅封夏國公賜姓李嗣襄王愠之
亂詔思恭討賊兵不出卒以弟思諫代為定難節度使
思孝為保大節度鄜坊丹翟等州觀察使竝檢校司徒

同中書門下平章事王行瑜反以思孝為北面招討使
思諫東北面招討使思孝亦因亂取鄜州遂為節度使
累兼侍中以老薦弟思敬為保大軍兵馬留後俄為節
度使

東女亦曰蘓伐刺拏瞿咀羅羌別種也西海亦有女自
王故稱東別之東與吐蕃党項茂州接西屬三波訶北
距于闐東南屬雅州羅女蠻白狼夷東西行盡九日南
北行盡二十日有八十城以君為君居康延川巖險四

繚有弱水南流縫革為船戶四萬勝兵萬人王號賓就
官曰高霸黎猶言宰相也官在外者率男子為之凡號
令女官自內傳男官受而行王侍女數百五日一聽政
王死國人以金錢數萬納王族求淑女二立之次為小
王王死因以為嗣或姑死婦繼無篡奪所居皆重屋王
九層國人六層王服青毛綾裙被青裒袖委於地冬羔
裘飾以文錦為小鬟髻耳垂璫足曳鞢鞢鞢履也俗
輕男子女貴者咸有侍男被髮以青塗面惟務戰與耕

而已子從母姓地寒宜麥畜羊馬出黃金風俗大抵與
天竺同以十一月為正巫者以十月詣山中布糴麥咒
呼羣鳥俄有鳥來如雞狀剖視之有穀者豐歲否即有
災名曰鳥卜居喪三年不易服不櫛沐貴人死剝藏其
皮內骨甕中糝金屑瘞之王之葬殉死至數十人武德
時王湯滂氏始遣使入貢高祖厚報為突厥所掠不得
通貞觀中使復至太宗璽制慰撫顯慶初遣使高霸黎
文與王子三盧來朝授右監門中郎將其王斂臂使大

臣來請官號武后冊拜欽臂左玉鈐衛員外將軍賜瑞
錦服天授開元間王及子再來朝詔與宰相宴曲江封
王曳夫為歸昌王左金吾衛大將軍後乃以男子為王
貞元九年其王湯立悉與白狗君及哥鄰君董卧庭逋
租君鄧吉知南水君薛尚悉曩弱水君董避和悉董君
湯息贊清遠君蘓唐磨吐霸君董藐蓬皆詣劍南韋臯
求內附其種散居西山弱水雖自謂王蓋小小部落耳
自失河隴悉為吐蕃羈屬部數千戶輒置令歲督絲絮

至是猶上天寶所賜詔書臯處其衆於維霸等州賜牛糧治生業立悉等入朝差賜官祿於是松州羌二萬口相踵入附立悉等官刺史皆得世襲然陰附吐蕃故謂兩面羌

高昌直京師西四千里而羸其橫八百里縱五百里凡二十一城王都交河城漢車師前王廷也田地城戍已校尉所治也勝兵萬人土沃麥禾皆再熟有草名白疊擷花可織為布俗辮髻垂後其王麴伯雅隋時嘗妻以

戚屬宇文氏女號華容公主武德初伯雅死子文泰立遣使來告高祖命使者臨弔後五年獻狗高六寸長尺能曳馬銜燭云出拂菻中國始有拂菻狗太宗即位獻玄狐裘帝賜妻宇文華鎮一具宇文亦上玉盤几諸國施為輒以聞貞觀四年文泰遂來朝禮賜厚甚宇文求預宗藉有詔賜氏李更封常樂公主久之文泰與西突厥通凡西域朝貢道其國咸見壅掠伊吾嘗臣西突厥至是內屬文泰與葉護共擊之帝下詔讓其反覆召大

臣冠軍阿史那矩計事文泰不遣使長史麴雍來謝罪
初大業末華民多奔突厥及頡利敗有逃入高昌者有
詔護送文泰苟留之又與西突厥乙毗設破焉耆三城
虜其人馬耆王訴諸朝帝遣虞部郎中李道裕問狀復
遣使謝帝引責曰而主數年朝貢不入無藩臣禮擅置
官擬効百僚今歲首萬君長悉來而主不至日我使人
往文泰猥曰鷹飛于天雉竄于蒿猫遊于堂鼠安于穴
各得其所豈不快邪西域使者入貢而主悉拘梗之又

諗薛延陀曰既自為可汗與唐天子等何事拜謁其使
明年我當發兵虜而國歸謂而君長自圖時薛延陀可
汗請為軍向導故民部尚書唐儉至延陀堅約帝復下
璽書示文泰禍福促使入朝文泰遂稱疾不至乃拜侯
君集為交河道大總管左屯衛大將軍薛萬均薩孤吳
仁副之契苾何力為蔥山道副大總管武衛將軍牛進
達為行軍總管率突厥契苾騎數萬討之羣臣諫以行
萬里兵難得志且天界絕域雖得之不可守帝不聽文

秦謂左右曰曩吾入朝見秦隴北城邑蕭條非有隋比
今伐我兵多則糧輒不逮若下三萬我能制之度磧疲
鈍以逸待勞臥收其敝耳十四年聞王師至磧口悸駭
無它計發病死子智盛立君集奄攻田地城契苾何力
以前軍鏖戰是夜星墜城中明日拔其城虜七千餘人
中郎將辛獠兒以勁騎夜逼其都智盛以書遺君集曰
得罪於天子者先王也咎深譴積震墜厥命智盛嗣位
未幾公其見赦君集曰能悔禍者當面縛軍門智盛不

答軍進填隍引衝車飛石如雨城中大震智盛令大將
麴士義居守身與綰曹麴德俊謁軍門請改事天子君
集諭使降辭未屈薛萬均勃然起曰當先取城小兒何
與語麾而進智盛流汗伏地曰唯公命乃降君集分兵
略定凡三州五縣二十二城戶八千口三萬馬四千先
是其國人謠曰高昌兵如霜雪唐家兵如日月日月照
霜雪幾何自殄滅文泰捕謠所發不能得也捷書聞天
子大悅宴羣臣班賜策功赦高昌所部披其地皆州縣

之號西昌州特進魏徵諫曰陛下即位高昌最先朝謁
俄以掠商胡過貢獻故王誅加焉文泰死罪止矣撫其
人立其子伐罪弔民道也今利其土屯守常千人屯土
數年一易辦裝資離親戚不十年隴右且空陛下終不
得高昌圭粒咫尺助中國費所謂散有用事無用不納
改西昌州曰西州更置安西都護府歲調千兵謫罪人
以戍黃門侍郎褚遂良諫曰古者先畎夏後夷狄務廣
德化不爭荒遐今高昌誅滅威動四夷然自王師始征

河西供役飛米轉芻十室九匱五年未可復今又歲遣
屯戍行李萬里去者資裝使自營辦賣菽粟傾機杼道
路死亡尚不計罪人始於犯法終於惰業無益於行所
遣復有亡命官司捕逮株蔓相牽有如張掖酒泉塵飛
烽舉豈得高昌一乘一卒及事乎必發隴右河西耳然
則河西為我腹心高昌佗人手足也何必耗中華事無
用昔陛下平頡利吐谷渾皆為立君益罪而誅之伏而
立之百蠻所以畏威慕德也今宜擇高昌可立者立之

召首領悉還本土長為藩翰中國不擾書聞不省初文
泰以金厚餉西突厥欲谷設約有急為表裏使葉護屯
可汗浮圖城及君集至懼不敢發遂來降以其地為廷
州焉耆請歸高昌所奪五城留兵以守君集勒石紀功
凱而旋俘智盛君臣獻觀德殿行飲至禮酺三日徙高
昌豪桀於中國智盛拜左武衛將軍金城郡公弟智湛
右武衛中郎將天山郡公麴氏傳國九世百三十四年
而亡智湛麟德中以左驍衛大將軍為西州刺史卒贈

涼州都督有子昭好學有嚮異書者母顧筭中金歎曰
何愛此不使子有異聞乎盡持易之昭歷司膳卿頗能
辭章弟宗裕有武藝永徽中為右武衛翊府中郎將封
交河郡王邑至三千戶終鎮軍大將軍武后為舉哀襚
以美錦賻賜甚厚封爵絕

吐谷渾居甘松山之陽洮水之西南抵白蘭地數千里
有城郭不居也隨水草帳室肉糧其官有長史司馬將
軍王公僕射尚書郎中蓋慕諸華為之俗識文字其王

椎髻黑冒妻錦袍織裘金鵝飾首男子服長裘繒冒或
冠罽羅婦人辮髮縈後綴珠貝婚禮富家厚納聘貧者
竊妻去父死妻庶母兄死妻嫂喪有服葬已即除民無
常稅用不足乃歛富室商人足而止凡殺人若盜馬者
死它罪贖以物地多寒宜麥菽粟蕪菁出小馬犛牛銅
鐵丹砂有青海者周八九百里中有山須冰合游牝馬
其上明年生駒號龍種嘗得波斯馬牧于海生驄駒日
步千里故世稱青海驄西北有流沙數百里夏有熱風

傷行人風將發老駝引項鳴埋鼻沙中人候之以氊蔽
鼻口乃無恙隋時其王慕容伏允號步薩鉢嘗寇邊煬
帝遣鐵勒敗之壁西平復命觀王雄破其衆伏允以數
十騎入泥嶺亡去仙頭王率男女十餘萬降置郡縣鎮
戍以長子順為質因王之統餘衆俄追還伏允客党項
隋亂因得復故地高祖受命順自江都還長安于時李
軌據涼州帝乃約伏允和令擊軌自効當護送順伏允
喜引兵與軌戰庫門交綏止即遣使請順帝遣之順至

號為太寧王太宗時伏允遣使者入朝未還即寇鄯州
帝遣使者讓且召伏允以疾為解而為子求婚驗帝意
帝召子親迎亦稱疾有詔止婚遣中郎將康處真臨諭
又掠岷州都督李道彥擊走之執名王二斬級七百連
歲遣名王朝俄寇涼州鄯州刺史李玄運表吐谷渾牧
馬青海輕兵掩之可盡致乃命左驍衛大將軍段志玄
左驍衛將軍梁洛仁率契苾党項兵擊之未至三十里
志玄等不欲戰壁而留虜知之驅牧馬走副將李君羨

率精騎尾襲懸水上得牛羊二萬還是時伏允耄不能
事其相天柱王用事拘天子行人鴻臚丞趙德楷帝遣
使曉敕十反無悛言貞觀九年詔李靖為西海道行軍
大總管侯君集積石道任城王道宗鄯善道李道彥赤
水道李大亮且末道高旣生鹽澤道竝為行軍總管率
突厥契苾兵擊之党項內屬羌及洮州羌皆殺刺史歸
伏允夏四月道宗破伏允于庫山俘斬四百伏允謀入
磧疲唐兵燒野草故靖馬多饑道宗曰柏海近河源古

未有至者伏允西走未知其在方馬癯糧乏難遠入不
如按軍鄯州須馬壯更圖之君集曰不然嚮者段志玄
至鄯州吐谷渾兵輒傳城彼國方完逆衆用命也今虜
大敗斥候無在君臣相失我乘其困可以得志柏海雖
遠可鼓而致也靖曰善分二軍靖與大亮薛萬均以一
軍趣北出其右君集道宗以一軍趣南出其左靖將薩
孤吳仁以輕騎戰曼都山斬名王獲五百級諸將戰牛
心堆赤水源獲虜將南昌王慕容孝雋收雜畜數萬君

集道宗登漢哭山戰烏海獲名王梁屈蔥靖破天柱部
落於赤海收雜畜二十萬大亮俘名王二十雜畜五萬
次且末之西伏允走圖倫磧將託于闐萬均督銳騎追
亡數百里又破之士乏水刺馬飲血君集道宗行空荒
二千里盛夏降霜乏水草士糜冰馬秣雪閱月次星宿
川達柏海上望積石山覽觀河源執失思力馳破虜車
重兩軍會于大非山破邏真谷順之質隋為金紫光祿
大夫伏允立其弟為太子順歸常鞅鞅自以失位欲以

功自結天子乃斬天柱王舉國降伏允懼引千餘騎遁
磧中衆稍亡從者纔百騎窮無聊即自經死國人立順
為君稱臣內附詔封西平郡王號越胡呂烏甘足可汗
帝恐未能定其國遣李大亮率精兵鎮援順久質華國
人不附卒為下所殺立其子燕王諾曷鉢諾曷鉢幼大
臣爭權帝詔侯君集就經紀之始請頒厯及子弟入侍
詔封諾曷鉢河源郡王號烏地也拔勒豆可汗遣淮陽
郡王道明持節冊命賜鼓纛諾曷鉢身入謝遂請婚獻

馬牛羊萬比年入朝乃以宗室女為弘化公主妻之詔
道明及右武衛將軍慕容寶持節送公主其相宣王跋
扈謀作亂欲襲公主劫諾曷鉢奔吐蕃諾曷鉢知之引
輕騎走鄯城威信王以兵迎之果毅都尉席君買率兵
與威信王共討斬其兄弟三人國大擾帝又詔民部尚
書唐儉中書舍人馬周持節撫慰高宗立以主故拜駙
馬都尉又獻名馬帝問馬種性使者曰國之最良者帝
曰良馬人所愛詔還其馬公主表請入朝遣右驍衛將

軍鮮于匡濟迎之十一月及諾曷鉢至京師帝又以宗室女金城縣主妻其長子蘓度摸末拜左領軍衛大將軍久之摸末死主與次子左武衛大將軍梁漢王闡盧摸未來請婚帝以宗室女金明縣主妻之既而與吐蕃相攻上書相曲直竝來請師天子兩不許吐谷渾大臣素知貴奔吐蕃言其情吐蕃出兵擣虛破其衆黃河上諾曷鉢不支與公主引數千帳走涼州帝遣左武衛大將軍蘓定方為安集大使平兩國怨吐蕃遂有其地諾

曷鉢請內徙乾封初更封青海國王帝欲徙其部於涼州之南山羣臣議難之咸亨元年乃以右威衛大將軍薛仁貴為邏娑道行軍大總管左衛員外大將軍阿史那道真左衛將軍郭待封副之總兵五萬討吐蕃且納諾曷鉢於故廷王師敗於大非川舉吐谷渾地皆陷諾曷鉢與親近數千帳纔免三年乃徙治疊水南諾曷鉢以吐蕃盛勢不抗而鄯州地狹又徙靈州帝為置安樂州即拜刺史欲其安且樂云諾曷鉢死子忠立忠死子

宣超立聖歷三年拜左豹韜員外大將軍襲故可汗號

餘部詣涼甘肅瓜沙等州降宰相張錫與右武衛大將

軍唐休璟議徙其人於秦隴豐靈間令不得畔去涼州

都督郭元振以為吐谷渾近秦隴則與監牧雜處置豐

靈又邇默啜假在諸華亦不遽移其性也前日王孝傑

自河源軍徙耽爾乙句貴置靈州既其叛乃入牧坊掠

羣馬癡夷州縣是則遷中土無益之成驗往素和貴叛

去於我無損但失吐谷渾數十部豈與句貴比邪今降

虜非彊服皆突矢刀棄吐蕃而來宜當循其情為之制也當甘肅瓜沙降者即其所置之因所投而居情易安磔數州則勢自分順其情分其勢不擾於人可謂善奪戎心者也歲遣鎮遏使者與宣超兄弟撫護之無令相侵奪生業固矣有如叛去無損中國詔可宣超死子曦皓立曦皓死子兆立吐蕃復取安樂州而殘部徙朔方河東語謬為退渾貞元十四年以朔方節度副使左金吾衛大將軍慕容復為長樂都督青海國王襲可汗號

復死停襲吐谷渾自晉永嘉時有國至龍朔三年吐蕃取其地凡三百五十年及此封嗣絕矣

焉耆國直京師西七千里而羸橫六百里縱四百里東高昌西龜茲南尉犂北烏孫逗渠漑田土宜麥蒲萄有魚鹽利俗祝髮羶衣戶四千勝兵二千常役屬西突厥俗尚娛遨二月肫出野祀四月望日游林七月七日起生祖十月望日王始出游至歲盡止太宗貞觀六年其王龍突騎支始遣使來朝自隋亂磧路閉故西域朝貢

皆道高昌突騎支請開大磧道以便行人帝許之高昌
怒大掠其邊西突厥莫賀設與吐陸弩失畢作難來奔
吐陸弩失畢復攻之遣使言狀并貢名馬啞利失可汗
立素善焉耆故倚為援十二年處月處蜜與高昌攻陷
其五城掠千五百人焚廬舍侯君集討高昌遣使與相
聞突騎支喜引兵佐唐高昌破歸向所俘及城遣使者
入謝西突厥臣屈利啜為弟娶突騎支女遂相約為輔
車勢不朝貢安西都護郭孝恪請討之會王弟頡鼻栗

婆準葉護等三人來降帝即命孝恪為西州道總管率兵出銀山道以粟婆準等為鄉導初焉耆所都周三十里四面大山海水繚其外故恃不為虞孝恪倍道絕水夜傳堞遲曙譟而登鼓角轟哄唐兵縱國人擾敗斬千餘級執突騎支更以粟婆準攝國事始帝語近臣曰孝恪以八月十一日詣焉耆閱二旬可至當以二十二日破之使者今至矣俄而遽入以捷布聞囚突騎支及妻子送洛陽有詔赦罪屈利啜以兵救焉耆而孝恪還三

日矣屈利啜囚栗婆準更使吐屯攝王遣使以告帝曰
焉耆我所下爾乃王之邪吐屯懼不敢王焉耆立栗婆
準而從兄薛婆阿那支自為王號瞎千執栗婆準獻龜
茲殺之阿史那社爾討龜茲阿那支奔之壁東境抗王
師為社爾所禽數其罪斬以徇立突騎支弟婆伽利為
王以其地為焉耆都督府婆伽利死國人請還前王突
騎支高宗許之拜左衛大將軍歸國死龍嬾突立武后
長安時以其國小人寡過使客不堪其勞詔四鎮經略

使禁止僦使私馬無品者肉食開元七年龍嬾突死焉
吐拂延立於是十姓可汗請居碎葉安西節度使湯嘉
惠表以馬者備四鎮詔焉者龜茲疏勒于闐征西域賈
各食其征由北道者輪臺征之訖天寶常朝賀

龜茲一曰丘茲一曰屈茲東距京師七千里而羸自焉
耆西南步一百里度小山經大河二又步七百里乃至
橫千里縱六百里土宜麻麥稔稻蒲萄出黃金俗善歌
樂旁行書貴浮圖法產予以木壓首俗斷髮齊項惟君

不剪髮姓白氏居伊邏盧城北倚阿羯田山亦曰白山

常有火王以錦冒頂錦袍寶帶歲朔鬪羊馬橐它七日

觀勝負以卜歲盈耗云蔥嶺以東俗喜淫龜茲于闐置

女肆征其錢高祖受禪王蕪伐勃駛遣使入朝會死子

蕪伐疊立號時健莫賀侯利發貞觀四年獻馬太宗賜

璽書撫慰加等後臣西突厥郭孝恪伐焉耆乃遣兵與

焉耆影援自是不朝貢蕪伐疊死弟訶黎布失畢立二

十一年兩遣使朝貢然帝怒其佐焉耆叛議討之是夜

月食昴詔曰月陰精用刑兆也星胡分數且終乃以阿
史那社尔為崑兵道行軍大總管契苾何力副之率安
西都護郭孝恪司農卿楊弘禮左武衛將軍李海岸等
發鐵勒十三部兵十萬討之社尔分五軍掠其北執焉
耆王阿那支龜茲大恐酋長皆棄城走社尔次磧石去
王城三百里先遣伊州刺史韓威以千騎居前右騎衛
將軍曹繼叔次之至多褐與王遇其將羯獵顛兵五萬
合戰威偽北王見威兵少麾而進威退與繼叔合還戰

大破之追奔八十里王嬰城社爾將圍之王引突騎西走城遂拔孝恪居守沙州刺史蘓海政行軍長史薛萬備以精騎窮躡六百里王計窮保撥換城社爾圍之閱月執王及羯獵顛其相那利夜逸以西突厥并國人萬餘來戰孝恪及子死之王師擾倉部郎中崔義起募兵戰城中繼叔威助擊之斬首三千級那利敗哀亡散復振還襲王師繼叔乘之斬八千級那利走或執以詣軍社爾凡破五大城男女數萬遣使者諭降小城七百餘

西域震懼西突厥安西國歸軍饗焉社尔立王弟葉護
王其國勒石紀功書聞帝喜見羣臣從容曰夫樂有幾
朕嘗言之土城竹馬童兒樂也飭金翠羅紈婦人樂也
貿遷有無商賈樂也高官厚秩士大夫樂也戰無前敵
將帥樂也四海寧一帝王樂也朕今樂矣遂徧觴之初
孝恪之擊焉耆也龜茲有浮屠善數歎曰唐家終有西
域不數年吾國亦亡社尔執訶黎布失畢那利羯獵顛
獻太廟帝受俘紫微殿帝責謂羣臣皆頓首伏詔赦罪

改館鴻臚寺拜布失畢左武衛中郎將始徙安西都護
於其都統于闐碎葉疏勒號四鎮高宗復封訶黎布失
畢為龜茲王與那利羯獵顛還國久之王來朝那利烝
其妻阿史那王不能禁左右請殺之由是更猜忌使者
言狀帝并召至京師囚那利護遣王還羯獵顛拒不內
遣使降賀魯王不敢進悒悒死詔左屯衛大將軍楊胄
發兵禽羯獵顛窮誅部黨以其地為龜茲都督府更立
子素稽為王授右驍衛大將軍為都督是歲徙安西都

護府於其國以故安西為西州都督府即拜左驍衛大將軍兼安西都護麴智湛為都督西域平帝遣使者分行諸國風俗物產詔許敬宗與史官撰西域圖志上元中素稽獻銀頗羅名馬天授三年王延田跌來朝始儀鳳時吐蕃攻焉耆以西四鎮皆沒長壽元年武威道總管王孝傑破吐蕃復四鎮地置安西都護府於龜茲以兵三萬鎮守於是沙磧荒絕民供貲糧苦甚議者請棄之武后不聽都護以政績稱華狄者田揚名郭元振張

孝嵩杜暹云開元七年王白莫必死子多帀立改名孝
節十八年遣弟孝義來朝自龜茲羸六百里踰小沙磧
有跋祿迦小國也一日亟墨即漢姑墨國橫六百里縱
三百里風俗文字與龜茲同言語少異出細氊褐西三
百里度石磧至淩山蔥嶺北原也水東流春夏山谷積
雪西北五百里至素葉水城比國商胡雜居素葉以西
數十城皆立君長役屬突厥自素葉水城至羯霜那國
衣氊褐皮氈以繒繚額素葉城西四百里至千泉地羸

二百里南雪山三垂平陸多泉池因名之突厥可汗歲避暑其中羣鹿飾鈴鐸可狎也西羸百里至咀邏私城亦比國商胡雜居有小城三百本華人為突厥所掠羣保此尚華語西南羸二百里至白水城原隰膏腴南五十里有笄赤建國廣千里地沃宜稼多蒲萄又二百里即石國

疏勒一曰佉沙環五千里距京師九千里而羸多沙磧少壤土俗尚詭詐生子亦夾頭取褊其人文身碧瞳王

姓裴氏自號阿摩支居迦師城突厥以女妻之勝兵二千人俗祠祆神貞觀九年遣使者獻名馬又四年與朱俱波甘棠貢方物太宗謂房玄齡等曰曩之一天下克勝四夷惟秦皇漢武耳朕提三尺劍定四海遠夷率服不減二君者然彼末路不自保公等宜相輔弼毋進諛言置朕於危亡也儀鳳時吐蕃破其國開元十六年始遣大理正喬夢松攝鴻臚少卿冊其君安定為疏勒王天寶十二載首領裴國良來朝授折衝都尉賜紫袍金

魚朱俱波亦名朱俱槃漢子合國也并有西夜蒲犂依耐得若四種地直于闐西千里蔥嶺北三百里西距喝盤陀北九百里屬疏勒南三千里女國也勝兵二千人尚浮屠法文字同婆羅門甘棠在海南崑崙人也喝盤陀或曰漢陀曰渴館檀亦謂渴羅陀由疏勒西南入劔末谷不怱嶺六百里其國也距瓜州四千五百里直朱俱波西南距懸度山北抵疏勒西護密西北判汗國也治蔥嶺中都城負徒多河勝兵千人其王本疏勒人世

相承為之西南即頭痛山也蔥嶺俗號極疑山環其國
人勁悍貌言如于闐其法殺人剝刼者死餘得贖賦必
輸服飾王坐人牀後魏大延中始通中國貞觀九年遣
使者來朝開元中破平其國置蔥嶺守捉安西極邊戍
也

于闐或曰瞿薩旦那亦曰渙那曰屈丹北狄曰于遁諸
胡曰豁旦距京師九千七百里瓜州羸四千里并有漢
戎盧杆彌渠勒皮山五國故地其居曰西山城勝兵四

千人有玉河國人夜視月光盛處必得美玉王居繪室
俗機巧言迂大喜事祇神浮屠法然貌恭謹相見皆跪
以木為筆玉為印凡得問遺書戴于首乃發之自漢武
帝以來中國詔書符節其王傳以相授人喜歌舞工紡
績西有沙磧鼠大如蝟色類金出入羣鼠為從初無桑
蠶丐鄰國不肯出其王即求婚許之將迎乃告曰國無
帛可持蠶自為衣女聞置蠶帽絮中關守不敢驗自是
始有蠶女刻石約無殺蠶蛾飛盡得治繭王姓尉遲氏

名屋密本臣突厥貞觀六年遣使者入獻後三年遣子
入侍阿史那社尒之平龜茲也其王伏闕信大懼使子
獻橐它三百長史薛萬備謂社尒曰今破龜茲西域皆
震恐願假輕騎羈于闐王獻京師社尒許之至于闐陳
唐威靈勸入見天子伏闕信乃隨使者來會高宗立授
右衛大將軍子葉護玷為右驍衛將軍賜袍帶布帛六
千段第一區留數月遣之請以子弟宿衛上元初身率
子弟酋領士十人來朝擊吐蕃有功帝以其地為毗沙

都督府析十州授伏閣雄都督死武后立其子璿開元
時獻馬駝豹璿死復立尉遲伏師戰為王死伏閣達嗣
并冊其妻執失為妃死尉遲珪嗣妻馬為妃珪死子勝
立至德初以兵赴難因請留宿衛乾元三年以其弟左
監門衛率葉護曜為太僕員外卿同四鎮節度副使權
知本國事勝自有傳于闐東三百里有建德力河七百
里有精絕國河之東有汗彌居達德力城亦曰拘彌城
即寧彌故城皆小國也初德宗即位遣內給事朱如玉

之安西求玉於于闐得圭一珂珮五枕一帶胯三百簪四十奩三十釧十杵三瑟瑟百斤并它寶等及還詐言假道回紇為所奪久之事泄得所市流死恩州

天竺國漢身毒國也或曰摩伽陀曰婆羅門去京師九千六百里都護治所二千八百里居蔥嶺南幅隕三萬里分東西南北中五天竺皆城邑數百南天竺瀕海出師子豹狸橐它犀象火齊琅玕石蜜黑鹽北天竺距雪山園抱如壁南有谷通為國門東天竺際海與扶南林

邑接西天竺與罽賓波斯接中天竺在四天竺之會都城曰茶縛和羅城濱迦毗黎河有別城數百皆置長別國數十置王曰舍衛曰迦沒路開戶皆東嚮曰迦尸或曰波羅奈亦曰波羅那斯其畜有稍割牛黑色角細長四尺許十日一割不然困且死人飲其血或曰壽五百歲牛壽如之中天竺王姓乞利啞氏亦曰刹利世有其國不篡殺土溥熟稻歲四熟禾之長者沒橐它以貝齒為貨有金剛旃檀鬱金與大秦扶南交趾相貿易人富

樂無簿籍耕王地者乃輸稅以舐足摩踵為致禮家有
奇樂倡伎王大臣皆服錦罽為螺髻於頂餘髮翦使卷
男子穿耳垂瑠或懸金耳緩者為上類徒跣衣重白婦
人頂飾金銀珠纓絡死者燔骸取灰建窆堵或委野中
及河餌鳥獸魚鼈無喪紀謀反者幽殺之小罪贖錢不
孝者斷手足劓耳鼻徙於邊有文字善步歷學悉墨章
妄曰梵天法書貝多葉以記事尚浮屠法不殺生飲酒
國中處處指曰佛故跡也信盟誓傳禁咒能致龍起雲

雨隋煬帝時遣裴矩通西域諸國獨天竺拂菻不至為
恨武德中國大亂王尸羅逸多勒兵戰無前象不弛鞍
士不釋甲因討四天竺皆北面臣之會唐浮屠玄奘至
其國尸羅逸多名見曰而國有聖人出作秦王破陣樂
試為我言其為人玄奘粗言太宗神武平禍亂四夷賓
服狀王喜曰我當東面朝之貞觀十五年自稱摩伽陀
王遣使者上書帝命雲騎尉梁懷璒持節慰撫尸羅逸
多驚問國人自古亦有摩訶震旦使者至吾國乎皆曰

無有戎言中國為摩訶震旦乃出迎膜拜受詔書戴之
頂復遣使者隨入朝詔衛尉丞李義表報之大臣郊迎
傾都邑縱觀道上焚香尸羅逸多率羣臣東面受詔書
復獻火珠鬱金菩提樹二十二年遣右衛率府長史王
玄策使其國以蔣師仁為副未至尸羅逸多死國人亂
其臣那伏帝阿羅那順自立發兵拒玄策時從騎纔數
十戰不勝皆沒遂剽諸國貢物玄策挺身奔吐蕃西鄙
檄召鄰國兵吐蕃以兵千人來泥婆羅以七千騎來玄

策部分進戰荼鏹和羅城三日破之斬首三千級溺水
死萬人阿羅那順委國走合散兵復陣師仁禽之俘斬
千計餘衆奉王妻息阻乾陀衛江師仁擊之大潰獲其
妃王子虜男女萬二千人雜畜三萬降城邑五百八十
所東天竺王尸鳩摩送牛馬三萬餽軍及弓刀寶纓絡
迦沒路國獻異物拜上地圖請老子象玄策執阿羅那
順獻闕下有司告宗廟帝曰夫人耳目玩聲色口鼻耽
臭味此敗德之原也婆羅門不劫吾使者寧至俘虜邪

擢玄策朝散大夫得方士那邏通娑婆寐自言壽二百歲有不死術帝改館使治丹命兵部尚書崔敦禮護視使者馳天下采怪藥異石又使者走娑羅門諸國所謂畔茶法水者出石臼中有石象人守之水有七種色或熱或冷能銷草木金鐵人手入輒爛以橐它髑髏轉注瓠中有樹名咀賴羅葉如梨生窮山崖腹前有巨虺守穴不可到欲取葉者以方鏃矢射枝則落為羣鳥銜去則又射乃得之其詭譎類如此後術不驗有詔聽還不

能去死長安高宗時盧伽逸多者東天竺烏荼人亦以
術進拜懷化大將軍乾封二年五天竺皆來朝開元時
中天竺遣使者三至南天竺一獻五色能言鳥乞師討
大食吐蕃乃名其軍玄宗詔賜懷德軍使者曰蕃夷惟
以袍帶為寵帝以錦袍金革帶魚袋并七事賜之北天
竺一來朝

摩揭它一曰摩伽陀本中天竺屬國環五十里土沃宜
稼穡有異稻巨粒號供大人米王居拘闍揭羅布羅城

或曰俱蘇摩補羅曰波吒釐子城北瀕疏伽河貞觀二十一年始遣使者自通於天子獻波羅樹樹類白楊太宗遣使取熬糖法即詔揚州上諸蔗柝瀋如其劑色味愈西域遠甚高宗又遣王玄策至其國摩訶菩提祠立碑焉後德宗自製鍾銘賜那爛陀祠又有那揭者亦屬國也貞觀二十年遣使者貢方物烏茶者一曰烏伏那亦曰烏菴直天竺南地廣五千里東距勃律六百里西蜀賓四百里山谷相屬產金鐵蒲萄鬱金稻歲熟人柔

詐善禁架術國無殺刑抵死者放之窮山罪有疑飲以藥視漉清濁而決輕重有五城王居術魯藥利城一曰魯揭釐城東北有達麗羅川即烏菴舊地貞觀十六年其王達摩因陀訶斯遣使者獻龍腦香璽書優答大食與烏菴東鄙接開元中數誘之其王與骨咄俱位二王不肯臣玄宗命使者冊為王章求拔國或曰章揭拔本西羌種居悉立西南四山中後徙山西與東天竺接衣服略相類因附之地袤八九百里勝兵二千人無城郭

好鈔暴商旅患之貞觀二十年其王羅利多菩伽因悉立國遣使者入朝玄策之討中天竺發兵來赴有功由是職貢不絕悉立當吐蕃西南戶五萬城邑多旁澗溪男子繒束頭衣氍褐婦人辮髮短裙昏姻不以財聘其穀宜杭稻麥豆死者葬於野不封樹喪制為黑衣滿年而除刑有剗劓常羈屬吐蕃

罽賓隋漕國也居蔥嶺南距京師萬二千里而羸南距舍衛三千里王居脩鮮城常役屬大月氏地暑濕人乘

象俗治浮屠法武德二年遣使貢寶帶金鎖水精醃頗
黎狀若酸棗貞觀中獻名馬太宗語大臣曰朕始即位
或言天子欲耀兵振伏四夷惟魏徵勸我修文德安中
夏中夏安遠人伏矣今天下大安四夷君長皆來獻此
徵力也遣果毅何處羅拔等厚齎賜其國并撫慰天竺
處羅拔至罽賓王東向稽首再拜仍遣人導護使者至
天竺十六年獻褥特鼠喙尖尾赤能食蛇螫者嗅且尿
瘡即愈國人共傳王始祖曰瞿孽至曷擲支傳十二世

顯慶三年以其地為脩鮮都督府神龍初拜其王脩鮮等十一州諸軍事脩鮮都督開元七年遣使獻天文及秘方奇藥天子冊其王為葛邏達支特勒後烏散特勒灑年老請以子拂菻屬婆嗣聽之天寶四年冊其子勃旬準為襲屬賓及烏菴國王乾元初使者朝貢

唐書卷二百二十一上

唐書卷二百二十一上考證

吐谷渾傳拔勒豆○豆舊書作足因字形相似而誤也
罽賓傳神龍初○舊書作龍朔沈炳震曰新書誤

唐書卷二百二十一上考證

欽定四庫全書薈要卷五千三百六十五

史部

唐書卷二百二十一下

宋端明殿學士宋祁撰

列傳第一百四十六下

西域

康者一曰薩末鞬亦曰颯秣建元魏所謂悉萬斤者其南距史百五十里西北距西曹百餘里東南屬米百里北中曹五十里在那密水南大城三十小堡三百君姓

溫本月氏人始居祁連北昭武城為突厥所破稍南依
葱嶺即有其地枝庶分王曰安曰曹曰石曰米曰何曰
火尋曰戊地曰史世謂九姓皆氏昭武土沃宜禾出善
馬兵彊諸國人嗜酒好歌舞於道王帽氍飾金雜寶女
子盤髻幪黑巾綴金鵲生兒以石蜜啖之置膠於掌欲
長而甘言持珎若黏云習旁行書善商賈好利丈夫年
二十去傍國利所在無不至以十二月為歲首尚浮圖
法祠祆神出機巧技十一月鼓舞乞寒以水交潑為樂

隋時其王屈木支娶西突厥女遂臣突厥武德十年始遣使來獻貞觀五年遂請臣太宗曰朕惡取虛名害百姓且康臣我緩急當同其憂師行萬里寧朕志邪卻不受俄又遣使獻師子獸帝珍其遠命秘書監虞世南作賦自是歲入貢致金桃銀桃詔令植苑中高帝永徽時以其地為康居都督府即授其王拂呼縵為都督萬歲通天中以大首領篤娑鉢提為王死子泥涅師師立死國人立突昏為王開元初貢鎖子鎧水精栴磳磳瓶駝

鳥卵及越諾侏儒胡旋女子其王烏勒伽與大食亟戰
不勝來乞師天子不許久之請封其子咄曷為曹王默
啜為米王詔許烏勒伽死遣使立咄曷封欽化王以其
母可敦為郡夫人安者一曰布豁又曰捕喝元魏謂忸
蜜者東北至東安西南至畢皆百里所西瀕烏滸河治
阿濫謐城即康居小君長罽王故地大城四十小堡千
餘募勇健者為柘羯柘羯者猶中國言戰士也武德時
遣使入朝貞觀初獻方物太宗厚慰其使曰西突厥已

降商旅可行矣諸胡大悅其王訶陵迦又獻名馬自言
一姓相承二十二世云是歲東安國亦入獻言子姓相
承十世云東安或曰小國曰喝汗在那密水之陽東距
河二百里許西南至大安四百里治喝汗城亦曰篳斤
大城二十小堡百顯慶時以阿濫為安息州即以其王
昭武殺為刺史篳斤為木鹿州以其王昭武閉息為刺
史開元十四年其王篤薩波提遣弟阿悉爛達拂耽發
黎來朝納馬豹後八年獻波斯驤二拂菻繡毼毼一鬱

金香石蜜等其妻可敦獻柘辟大毬二繡毬一可
賜袍帶鎧仗及可敦袷褕裝澤東曹或曰率都沙那蘇
對沙那劫布咀那蘇都識匿凡四名居波悉山之陰漢
貳師城地也東北距俱戰提二百里北至石西至康東
北寧遠皆四百里許南至吐火羅五百里有野义城城
有巨窟嚴以闕鑰歲再祭人向窟立中即烟出先觸者
死武德中與康同遣使入朝其使曰本國以臣為健兒
聞秦王神武欲隸麾下高祖大悅西曹者隋時曹也南

接史及波覽治瑟底痕城東北越於底城有得悉神祠
國人事之有金具器款其左曰漢時天子所賜武德中
入朝天寶元年王哥邏僕羅遣使者獻方物詔封懷德
王即上言祖考以來奉天可汗願同唐人受調發佐天
子征討十一載東曹王設阿忽與安王請擊黑衣大食
玄宗慰之不聽中曹者居西曹東康之北王治迦底真
城其人長大工戰鬪石或曰柘支曰柘折曰赭時漢大
宛北鄙也去京師九千里東北距西突厥西北波臘南

二百里所抵俱戰提西南五百里康也圓千餘里右涯
素葉河王姓石治柘折城故康居小王窟匿城地西南
有藥殺水入中國謂之真珠河亦曰質河東南有大山
生瑟瑟俗善戰多良馬隋大業初西突厥殺其王以特
勒匐職統其國武德貞觀間數獻方物顯慶三年以瞰
羯城為大宛都督府授其王瞰土屯攝舍提於屈昭穆
都督開元初封其君莫賀咄吐屯有功為石國王二十
八年又冊順義王明年王伊捺吐屯屈勒上言今突厥

已屬天可汗惟大食為諸國患請討之天子不許天寶
初封王子那俱車鼻施為懷化王賜鐵券久之安西節
度使高仙芝劾其無藩臣禮請討之王約降仙芝遣使
者護送至開遠門俘以獻斬闕下於是西域皆怨王子
走大食乞兵攻怛邏斯城敗仙芝軍自是臣大食寶應
時遣使朝貢有碎葉者出安西南地千里所得勃達嶺
南抵中國北突騎施南鄙也西南至葱嶺贏二千里水
南流者經中國入於海北流者經胡入於海北三日行

度海春夏常雨雪繇勃達嶺北行贏千里得碎葉川東
曰熱海地寒不凍西有碎葉城天寶七載北庭節度使
王正見伐安西毀之川長千里有異姓突厥兵數萬耕
者皆擐甲相掠為奴婢西屬怛邏斯城石常分兵鎮之
自此抵西海矣三月訖九月未嘗雨人以雪水溉田石
東南千餘里有怖悍者山四環之地膏腴多馬羊西千
里距堵利瑟那東臨葉葉水水出葱嶺北原色濁西北
流入大磧無水草望大山尋遺齒知所指五百餘里即

康也米或曰彌末曰弭抹賀北百里距康其君治鉢息
德城永徽時為大食所破顯慶三年以其地為南謚州
授其君昭武開拙為刺史自是朝貢不絕開元時獻璧
舞筵師子胡旋女十八年大首領末野門來朝天寶初
封其君為恭順王母可敦郡夫人何或曰屈霜你迦曰
貴霜匿即康居小王附墨城故地城左有重樓北繪中
華古帝東突厥婆羅門西波斯拂菻等君王其君旦詣
拜則退貞觀十五年遣使者入朝永徽時上言聞唐出

師西討願輸糧於軍俄以其地為貴霜州授其君昭武
婆達地刺史遣使者鉢底失入謝火尋或曰貨利習彌
曰過利居烏許水之陽東南六百里距戍地西南與波
斯接西北抵突厥曷薩乃康居小王與犍城故地其君
治急多颶遮城諸胡惟其國有車牛商賈乘以行諸國
天寶十載君稍施芬遣使者朝獻黑鹽寶應時復入朝
史或曰佉沙曰羯霜那居獨莫水南康居小王蘇薤城
故地西百五十里距那色波北二百里屬米南四百里

吐火羅也有鐵門山左右巉峭石色如鐵為闕以限二
國以金銅闔城有神祠每祭必千羊用兵類先禱乃行
國有城五百隋大業中其君狄遮始通中國號最强盛
築乞史城地方數千里貞觀十六年君沙瑟畢獻方物
顯慶時以其地為佉沙州授君昭武失阿喝刺史開元
十五年君忽必多獻舞女文豹後君長數死立然首領
時時入朝天寶中詔改史為來威國那色波亦曰小史
蓋為史所役屬居吐火羅故地東阨葱嶺西接波刺斯

南雪山循縛芻水北有咀蜜種亦自國東西六百里所
又東踰四種有鏹沙者廣三百里長五百里東界骨咄
接葱嶺有十八種南有揭職稍大幅負準千里陵阜連
屬多菽麥氣寒烈東南抵雪山六百里道吐火羅又踰
五種至婆羅覩邏北踰山行六百里得烏菴種東北行
二百里至河波羅水水西南流春夏涸凍北歷十二種
有婆羅吸摩補羅最大種繇地四千里山周其外土沃
產鍤水精北大雪山即東女也歷十九種得摩揭陀又

東過四種踰大河有迦摩縷波皆阪險地接西南夷其
人類蠻獠行二月叩蜀南邊其東南野象羣暴故戰用
象軍又南歷三十二種有狼揭羅耆地大數千里其君
治宰菟黎濕伐羅城西北即波刺斯傳言廣萬里王治
蘇刺薩儻那城土溫溥引水為田人富饒出金銀水精
多工巧織錦褐氍毹產善馬橐它人服錦氍毹稅口出
四銀錢又以交易西北距拂菻西南際海島有西女種
皆女子多珍貨附拂菻拂菻君長歲遣男子配焉俗產

男不舉又有臂多勢羅四種西北踰大山廣川歷小城聚行二千里即謝颺也北五百里有弗栗恃薩儻那地橫二千里縱千里其君突厥種治護苾那城東北大雪山盛夏常凍鑿冰乃可度下有安咀羅縛耆地三千里西北踰嶺四百里有闊悉多西北三百里有活種大二千里此三種皆居吐火羅故地臣於突厥君亦突厥種主鐵門南諸戎遷徙不常東又有七種東南峽道險甚無慮三百里得俱蘭東北山行五百里即護密北識匿

也南有商彌地大二千里而贏多蒲陶生雌黃鑿石乃
得東北踰山七百里至波譚羅川東西千里南北百里
春夏雨雪南有鉢露種多紫金行五百里有竭盤陀東
行八百里出葱嶺又八百里至烏鎩環千里出白鷺青
三種玉君長世臣竭盤陀北徑磧曠野五百里得疏勒
東南五百里濟徒多水踰大沙嶺有所句迦種或曰沮
渠地千里東踰嶺八百里即于闐也東有婁摩川度磧
行二百里得尼壤城在大澤中地墊如蘆葦荒茂行者

鑿道趣城通于闐而于闐以為東關又東行入大流沙
人行無跡故往返輒迷聚遺骸以識道無水草多熱風
觸人及六畜昏迷仆行四百里至故都邏又六百里至
故折摩馱那古且末也又千里至故納縛波古樓蘭也
自但蜜以下諸種相與羣聚華人皆以國名之故未嘗
與唐通傳記雜詭不可得而考然其地與諸國相連屬
粗序其名云

寧遠者本拔汗那或曰鎊汗元魏時謂破洛那去京師

八千里居西韃城在真珠河之北有大城六小城百人
多壽其王自魏晉相承不絕每元日王及首領判二朋
朋出一人被甲鬪衆以瓦石相之有死者止以卜歲善
惡貞觀中王契苾為西突厥瞰莫賀咄所殺阿瑟那鼠
匿奪其城鼠匿死子遏波之立契苾兄子阿了參為王
治呼悶城遏波之治渴塞城顯慶初遏波之遣使朝貢
高宗厚慰諭三年以渴塞城為休循州都督授阿了參
刺史自是歲朝貢玄宗開元二十七年王阿悉爛達干

助平吐火仙冊拜奉化王天寶三載改其國號寧遠帝
以外家姓賜其王曰竇又封宗室女為和義公主降之
十三載王忠節遣子薛裕朝請留宿衛習華禮聽之授
左武衛將軍其事唐最謹

大勃律或曰布露直吐蕃西與小勃律接西鄰北天竺
烏菴地宜鬱金役屬吐蕃萬歲通天逮開元時三遣使
者朝故冊其君蘇弗舍利支離泥為王死又冊蘇麟陀
逸之嗣王凡再遣大首領貢方物小勃律去京師九千

里而羸東少南三千里距吐蕃贊普牙東八百里屬烏
菟東南三百里大勃律南五百里箇失蜜北五百里當
護密之娑勒城王居孽多城臨娑夷水其西山巔有大
城曰迦布羅開元初王沒謹忙來朝玄宗以兒子畜之
以其地為綏遠軍國迫吐蕃數為所困吐蕃曰我非謀
爾國假道攻四鎮爾久之吐蕃奪其九城沒謹忙求救
北廷節度使張孝嵩遣疏勒副使張思禮率銳兵四千
倍道往沒謹忙因出兵大破吐蕃殺其衆數萬復九城

詔冊為小勃律王遣大首領察卓那斯摩沒勝入謝沒
謹忙死子難泥立死兄麻來分立死蘇失利之立為吐
蕃陰誘妻以女故西北二十餘國皆臣吐蕃貢獻不入
安西都護三討之無功天寶六載詔副都護高仙芝伐
之前遣將軍席元慶馳千騎見蘇失利之曰請假道趨
大勃律城中大酋五六皆吐蕃腹心仙芝約元慶吾兵
到必走山出詔書召慰賜繒綵縛首領待我元慶如約
蘇失利之挾妻走不得其處仙芝至斬為吐蕃者斷娑

夷橋是暮吐蕃至不能救仙芝約王降遂平其國於是
拂菻大食諸胡七十二國皆震恐咸歸附執小勃律王
及妻歸京師詔改其國號歸仁置歸仁軍募千人鎮之
帝赦蘇失利之不誅授右威衛將軍賜紫袍黃金帶使
宿衛

吐火羅或曰吐豁羅曰覩貨邏元魏謂吐呼羅者居葱
嶺西烏許河之南古大夏地與挹怛雜處勝兵十萬國
土著少女多男北有頗黎山其陽穴中有神馬國人游

牧牝於側生駒輒汗血其王號葉護武德貞觀時再入
獻永徽元年獻大鳥高七尺色黑足類橐駝翅而行日
三百里能噉鐵俗謂駝鳥顯慶中以其阿緩城為月氏
都督府析小城為二十四州授王阿史那都督後二年
遣子來朝俄又獻碼碯燈樹高三尺神龍元年王那都
泥利遣弟僕羅入朝留宿衛開元天寶間數獻馬騁異
藥乾陀婆羅二百品紅碧玻瓈乃冊其君骨咄祿頓達
度為吐火羅葉護挹怛王其後鄰胡羯師謀引吐蕃攻

吐火羅於是葉護失里忙伽羅可安西兵助討帝為出
師破之乾元初與西域九國發兵為天子討賊肅宗詔
隸朔方行營挹怛國漢大月氏之種大月氏為烏孫所
奪西過大宛擊大夏臣之治藍氏城大夏即吐火羅也
噉達王姓也後裔以姓為國訛為挹怛亦曰挹闐俗類
突厥天寶中遣使朝貢俱蘭或曰俱羅弩曰屈浪弩與
吐火羅接環地三千里南大雪山北俱魯河出金精琢
石取之貞觀二十年其王忽提婆遣使者來獻書辭類

浮屠語劫者居葱嶺中西及南距賒彌西北挹怛也去
京師萬二千里氣常熱有稻麥粟豆畜羊馬俗死棄於
山武德二年遣使者獻寶帶玻璃水精栝越底延者南
三千里距天竺西北千里至賒彌東北五千里至瓜州
居辛頭水之北其法不殺人重罪流輕罪放無租稅俗
翦髮被錦袍貧者白氎自澡潔氣溫多稻米石蜜

謝颺居吐火羅西南本曰漕矩吒或曰漕矩顯慶時謂
訶達羅文武后改今號東距罽賓東北帆延皆四百里

南婆羅門西波斯北護時健其王居鶴悉那城地七千里亦治阿娑你城多鬱金瞿草瀆泉灌田國中有突厥屬賓吐火羅種人雜居屬賓取其子弟持兵以禦大食景雲初遣使朝貢後遂臣屬賓開元八年天子冊葛達羅支頡利發誓屈爾為王至天寶中數朝獻帆延者或曰望衍曰梵衍那居斯畢莫運山之旁西北與護時健接東南距屬賓西南訶達羅支與吐火羅連境地寒人穴處王治羅爛城有大城四五水北流入烏許河貞觀

初遣使者入朝顯慶三年以羅爛城為寫鳳都督府縛
時城為悉萬州授王蔔寫鳳州都督管内五州諸軍事
自是朝貢不絕石汗那或曰斫汗那自縛底野南入雪
山行四百里得帆延東臨烏許河多赤豹開元天寶中
一再朝獻

識匿或曰尸棄尼曰瑟匿東南直京師九千里東五百
里距葱嶺守捉所南三百里屬護密西北五百里抵俱
蜜初治苦汗城後散居山谷有大谷五首長自為治謂

之五識匿地二千里無五穀人喜攻剽劫商賈播蜜川
四谷稍不用王號令俗窟室貞觀二十年與似沒役槃
二國使者偕來朝開元十二年授王布遮波資金吾衛
大將軍天寶六載王跌失伽延從討勃律戰死擢其子
都督左武衛將軍給祿居蕃似沒者北接石土俗與康
同役槃亦與康隣出良馬俱蜜者治山中在吐火羅東
北南臨黑河其王突厥延陀種貞觀十六年遣使者入
朝開元中獻胡旋舞女其王那羅延頗言為大食暴賦

天子恒慰遣而已天寶時王伊悉爛俟斤又獻馬護蜜
者或三道摩悉鐵帝曰雙侶元魏所謂鉢和者亦吐火
羅故地東南直京師九千里而羸橫千六百里縱狹纔
四三三五居寒迦審城北臨烏許河地寒沍堆阜曲折
沙石流漫有豆麥宜木果出善馬人碧瞳顯慶時以地
爲獻王沙鉢羅頡利發爲刺史地當四鎮入吐火
羅道故後屬吐蕃開元八年冊其王羅旅伊陀骨咄祿
多毗伽莫賀達摩薩爾爲王十六年與米首領米忽汗

同獻方物明年大酋烏鵲達干復朝王死冊其從弟護
真檀嗣王二十九年身入朝宴內殿拜左金吾衛將軍
賜紫袍金帶天寶初王子頡吉盭請絕吐蕃賜鐵券八
載真檀來朝請宿衛詔可授右武衛將軍久乃遣又遣
首領朝貢乾元元年王紇設伊俱鼻施來朝賜氏李
箇失蜜或曰迦濕彌邏北距勃律五百里環地四千里
山回繚之他國無能攻伐王治撥邏勿邏布邏城西瀕
彌那悉多大河地宜稼多雪不風出火珠鬱金龍種馬

俗毛褐世傳地本龍池龍徙水竭故往居之開元初遣使者朝八年詔冊其王真陀羅祕利為王間獻胡藥天
木死弟木多筆立遣使者物理多來朝且言有國以來
竝臣天可汗受調發國有象馬步三種兵臣身與中天
竺三阬吐蕃五大道禁出入戰輒勝有如天可汗兵至
輒降者雖衆二十萬能輸糧以助又國有摩訶波多磨
龍池願為天可汗營祠因丐王冊鴻臚譯以聞詔內物
理多宴中殿賜賚優備冊木多筆為王自是職貢有常

其役屬五種亦名國所謂咀义始羅者地二千里有都城東南餘七百里得僧訶補羅地三千餘里亦治都城東南山行五百里得烏刺尸地二千里有都城宜稼稽東南限山千里即箇失蜜西南行險七百里得半斂蹉地二千里又得曷邏閣補羅者其大四千里有都城多山阜人驍勇五種皆無君長云

骨咄或曰珂咄羅廣長皆千里王治思助建城多良馬赤豹有四大鹽山山出烏鹽開元十七年王俟斤遣子

骨都施來朝二十一年王頡利發獻女樂又遣大首領
多博勒達干朝貢天寶十一載冊其王羅金節為葉護
蘇毗本西羌族為吐蕃所并號孫波在諸部最大東與
多彌接西距鶻莽硤戶三萬天寶中王沒陵贊欲舉國
內附為吐蕃所殺子悉諾率首領奔隴右節度使哥舒
翰護送闕下玄宗厚禮之多彌亦西羌族役屬吐蕃號
難磨濱犂牛河土多黃金貞觀六年遣使者朝貢賜遣
之伊吾城者漢宜禾都尉所治商胡雜居勝兵千附鐵

勒人驍悍土良沃隋末內屬置伊吾郡天下亂復臣突厥貞觀四年城酋來朝頡利滅舉七城降列其地為西伊州

師子居西南海中延袤二千餘里有稜伽山多奇寶以寶置洲上商舶償直輒取去後隣國人稍往居之能馴養師子因以名國總章三年遣使者來朝天寶初王尸羅迷迦再遣使獻大珠鈿金寶瓔象齒白氎

波斯居達過水西距京師萬五千里而羸東與吐火羅

康接北隣突厥可薩部西南皆瀕海西北羸四千里拂
菰也人數十萬其先波斯匿王大月氏別裔王因以姓
又為國號治二城有大城十餘俗尊右下左祠天地日
月水火祠夕以麝揉蘇澤彫顏鼻耳西域諸胡受其法
以祠祆拜必交股俗徒跣丈夫祝髮衣不剖襟青白為
巾帔緣以錦婦辮髮著後戰乘象一象士百人負則盡
殺斷罪不為文書決於廷叛者鐵灼其舌瘡白為直黑
為曲刑有髡鉗刖劓小罪彫或系木於頸以時月而置

劫盜囚終老偷者輸銀錢凡死棄於山服閱月除氣常
歆熟地夷漫知耕種畜牧有驚鳥能噉羊多善犬驥大
驢產珊瑚高不三尺隋末西突厥葉護可汗討殘其國
殺王庫薩和其子施利立葉護使部帥監統施利死遂
不肯臣立庫薩和女為王突厥又殺之施利之子單羯
方奔拂菻國人迎立之是為伊怛支死兄子伊嗣俟立
貞觀十二年遣使者沒似半朝貢又獻活褥蛇狀類鼠
色正青長九寸能捕穴鼠伊嗣俟不君為大酋所逐奔

吐火羅半道大食擊殺之子卑路斯入吐火羅以免遣使者告難高宗以遠不可師謝遣會大食解而去吐火羅以兵納之龍朔初又訴為大食所侵是時天子方遣使者到西域分置州縣以疾陵城為波斯都督府即拜卑路斯為都督俄為大食所滅雖不能國咸亨中猶入朝授右武衛將軍死始其子泥涅師為質調露元年詔裴行儉將兵護還將復王其國以道遠至安西碎葉行儉還泥涅師因客吐火羅二十年部落益離散景龍初

復來朝授左威衛將軍病死西部獨存開元天寶間遣使者十輩獻碼碯牀火毛繡舞筵乾元初從大食襲廣州焚倉庫廬舍浮海走大厯時復來獻又有陀拔斯單者或曰陀拔薩憐其國三面阻山北瀕小海居婆里城世為波斯東大將波斯滅不肯臣大食天寶五載王忽魯汗遣使入朝封為歸信王後八年遣子自會羅來朝拜右武衛貲外中郎將賜紫袍金魚留宿衛為黑衣大食所滅貞觀後遠小國君遣使者來朝獻有司未嘗參

考本末者今附之左方曰火辭彌與波斯接貞觀十八年與摩羅游使者偕朝二十一年有健達王獻佛土菜莖五葉赤華紫須龍朔元年多福王難婆修彊宜說遣使者來朝總章元年有末陀提王開元五年有習阿薩般王安殺並遣使者朝貢七年訶毗施王捺塞因吐火羅大酋羅摩獻師子五色鸚鵡天寶時來朝者曰俱爛那曰舍摩曰威遠曰蘇吉利發屋蘭曰蘇利悉單曰建城曰新城曰俱位凡八國俱位或曰商彌治阿賒颶師

多城在大雪山勃律河北地寒有五穀蒲萄若榴冬窟
室國人常助小勃律為中國候新城之國在石東北羸
百里有弩室羯城亦曰新城曰小石國城後為葛邏祿
所并

拂菻古大秦也居西海上一曰海西國去京師四萬里
在苦西北直突厥可薩部西瀕海有遲散城東南接波
斯地方萬里城四百勝兵百萬十里一亭三亭一置臣
役小國數十以名通者曰澤散曰驢分澤散直東北不

得其道里東渡海二千里至驢分國重石為都城廣八
十里東門高二十丈釦以黃金王宮有三襲門皆飾異
寶中門中有金巨稱一作金人立其端屬十二丸率時
改一丸落以瑟瑟為殿柱水精琉璃為枕香木梁黃金
為地象牙闔有貴臣十二共治國王出一人挈囊以從
有訟書投囊中還省枉直國有大災異輒廢王更立賢
者王冠如鳥翼綴珠衣錦繡前無襟坐金鵞榻側有鳥
如鵝綠毛上食有毒輒鳴無陶瓦屑白石墜屋堅潤如

玉盛暑引水上流氣為風男子翦髮衣繡右袒而帔乘
輜輶白蓋小車出入建旌旗擊鼓婦人錦巾家貲億萬
者為上官俗喜酒嗜乾餅多幻人能發火於顏手為江
湖口幡眊舉足墮珠玉有善醫能開腦出蟲以愈目青
土多金銀夜光璧明月珠大貝車磔碼磔木難孔翠虎
魄織水羊毛為布曰海西布海中有珊瑚洲海人乘大
舶墮鐵網水底珊瑚初生盤石上白如菌一歲而黃三
歲赤枝格交錯高三四尺鐵發其根繫網舶上絞而出

之失時不取即腐西海有市貿易不相見置直物旁名
鬼市有獸名贛大如狗獷惡而力北邑有羊生土中臍
屬地割必死俗介馬而走擊鼓以驚之羔臍絕即逐水
草不能羣貞觀十七年王波多力遣使獻赤玻璃綠金
精下詔答賚大食稍彊遣大將軍摩拽伐之拂菻約和
遂臣屬乾封至大足再朝獻開元七年因吐火羅大首
獻師子羚羊自拂菻西南度磧二千里有國曰磨鄰曰
老勃薩其人黑而性悍地瘴癘無草木五穀飼馬以槁

魚人食鵲莽鵲莽波斯棗也不恥烝報於夷狄最甚號
曰尋其君臣七日一休不出納交易飲以窮夜

大食本波斯地男子鼻高黑而髯女子白皙出輒鄣面
日五拜天神銀帶佩銀刀不飲酒舉樂有禮堂容數百
人率七日王高坐為下說曰死敵者生天上殺敵受福
故俗勇於鬪土磽礫不可耕獵而食肉刻石蜜為廬如
輦狀歲獻貴人蒲萄大者如雞卵有千里馬傳為龍種
隋大業中有波斯國人牧於俱紛摩地那山有獸言曰

山西三穴有利兵黑石而白文得之者王走視如言石
文言當反乃詭衆衰亡命於恒曷水劫商旅保西鄙自
王移黑石寶之國人往討之皆大敗還於是遂彊滅波
斯破拂菻始有粟麥倉庾南侵婆羅門并諸國勝兵至
四十萬康石皆往臣之其地廣萬里東距突騎施西南
屬海海中有撥拔力種無所附屬不生五穀食肉刺牛
血和乳飲之俗無衣服以羊皮自蔽婦人明皙而麗多
象牙及阿末香波斯賈人欲往市必數千人納氎劊血

誓乃交易兵多牙角而有弓矢鎧稍士至二十萬數為
大食所破略永徽二年大食王噶蜜莫末臙始遣使者
朝貢自言王大食氏有國三十四年傳二世開元初復
遣使獻馬鈿帶謁見不拜有司將劾之中書令張說謂
殊俗慕義不可寘於罪玄宗赦之使者又來辭曰國人
止拜天見王無拜也有司切責乃拜十四年遣使蘇黎
滿獻方物拜果毅賜緋袍帶或曰大食族中有孤列種
世酋長號白衣大食種有二姓一曰盆尼末換二曰奚

深有摩訶末者勇而智衆立為王闢地三千里克夏臘城傳十四世至末換殺兄伊疾自王下怨其忍有呼羅珊木鹿人並波悉林將討之徇衆曰助我者皆黑衣俄而衆數萬即殺末換求奚深種孫阿蒲羅拔為王更號黑衣大食蒲羅死弟阿蒲恭拂立至德初遣使者朝貢代宗取其兵平兩京阿蒲恭拂死子迷地立死弟訶論立貞元時與吐蕃相攻吐蕃歲西師故鮮盜邊十四年遣使者含差烏鷄沙北三人朝皆拜中郎將賚遣之傳

言其國西南二千里山谷間有木生花如人首與語輒
笑則落東有末祿小國也治城郭多木姓以五月為歲
首以畫缸相獻有尋支瓜大者十人食乃盡蔬有顆葱
葛藍軍達茭薤大食之西有苦者亦自國北距突厥可
薩部地數千里有五節度勝兵萬人土多禾有大川東
流入亞俱羅商賈往來相望云自大食四十五日行得
都盤西距羅利支十五日行南即大食二十五日行北
勃達一月行勃達之東距大食二月行西抵岐蘭二十

日行南都盤北大食皆一月行岐蘭之東南二十日行
得阿沒或曰阿昧東南距陀拔斯十五日行南沙蘭一
月行北距海二日行居你訶溫多城宜馬羊俗柔寬故
大食常游牧於此沙蘭東距羅利支北怛滿皆二十日
行西即大食二十五日行羅利支東距都盤北陀拔斯
皆十五日行西沙蘭二十日行南大食二十五日行怛
滿或曰怛沒東陀拔斯南大食皆一月行北岐蘭二十
日行西大食一月行居烏訥河北平川中獸多師子西

北與史接以鐵關為限天寶六載都盤等六國皆遣使
者入朝乃封都盤王謀思健摩訶延曰順化王勃達王
摩訶澁斯曰守義王阿沒王俱那胡設曰恭信王沙蘭
王卑路斯威曰順禮王羅利支王伊思俱習曰義寧王
怛湍王謝沒曰奉順王

贊曰西方之戎古未嘗通中國至漢始載烏孫諸國後
以名字見者寔多唐興以次修貢蓋百餘皆冒萬里而
至亦已勤矣然中國有報贈冊帛程糧傳驛之費東至

高麗南至真臘西至波斯吐蕃堅昆北至突厥契丹靺鞨謂之八蕃其外謂之絕域視地遠近而給費開元盛時稅西域商胡以供四鎮出北道少納賦輪臺地廣則費倍此盛王之鑒也

唐書卷二百二十一 下

唐書卷二百二十一 下考證

波斯傳是為伊怛支○怛舊書作恒

伊嗣俟立○俟舊書作侯

唐書卷二百二十一 下考證

謹案卷二百二十一上第一頁後五行楹楹皆大
琲雜寶刊本楹訛極據舊書西戎傳改


第六頁前三行萬吉等七州刊本吉訛言據本書
地理志改

第十八頁前七行遣淮陽郡王道明刊本淮訛睢
據監本毛本及舊書西戎傳改

第三十四頁後八行產金鐵蒲萄刊本萄訛殖據
監本毛本改

卷二百二十一下第二頁前一行其王屈木支案
舊書木作朮與此異

第三頁前四行亦曰籊斤檢各本字書無籊字本
書釋音及文獻通考此語下俱無音訓應是舊
有音而傳寫失之



總校官庶吉士臣侍朝

校對官庶吉士臣嚴福

膳錄舉人臣杜安詩